

UMP universiti teknikal pertama ada tiga pasukan PALAPES

BH (C) 1/12/16 (KHEMTE) MS: V10

Fakta nombor

276 JUMLAH keseluruhan pegawai kadet UMP

147 PEGAWAI kadet baharu

Kuantan: Buat julung kalinya Universiti Malaysia Pahang (UMP) menganjurkan Perbarisan Utung Komandan yang disertai oleh ketiga-tiga Pasukan Latihan Pegawai Simpanan (PALAPES) UMP membabitkan seramai 276 pegawai kadet.

Perbarisan itu diketuai oleh Leftenan Muda Mohd Lufti Fajri Zaidan dan menerima tabik hormat daripada Komandan PALAPES UMP, Kapten Prof Datuk Dr Daing Nasir Ibrahim yang diiringi Pasukan Pancaragam dari 1 Armor Diraja.

Acara bermula dengan upacara angkat sumpah yang disertai 147 pegawai kadet baharu terdiri daripada 45 PALAPES Darat, 49 PALAPES Laut dan 53 PALAPES Udara sebelum upacara pemakaian pangkat disempurnakan Prof Daing Nasir kepada 35 Pegawai Kadet PALAPES Laut yang dinaikkan pangkat sebagai

Pegawai Kadet Kanan.

Selain itu, 45 Pegawai Kadet PALAPES Udara Junior dinaikkan pangkat sebagai Intermediate dan 50 Pegawai Kadet Intermediate lagi sebagai Kadet Senior.

Prof Daing Nasir ketika berucap pada acara perbarisan itu, berkata universiti amat berbangga dengan penubuhan pasukan PALAPES Darat pada tahun ini yang secara tidak langsung melengkapkan ketiga-tiga perkhidmatan PALAPES di UMP.

Beliau berkata, perkembangan itu menjadikan UMP universiti pertama yang mempunyai perkhidmatan ketiga-tiga PALAPES dalam kalangan Rangkaian Universiti-Universiti Teknikal Malaysia (MTUN).

Menjadi contoh

Katanya, adalah diharap semua pegawai kadet dapat menjadi contoh positif serta mengorak langkah



ke hadapan untuk terus melahirkan generasi yang cemerlang dari segi akademik, mental dan fizikal.

Yang turut hadir ialah Penolong Pesuruhjaya, Prof Mashitah Mohd Yusof; Prof Mejar Kehormat, Dr Jasni Mohamad Zain; Bendahari UMP, Zainudin Othman; Pengarah Pusat Kokurikulum UMP, Ramle Abid; Kapten (AW), Prof Madya

Dr Ahmad Ziad Sulaiman dan Penyelaras Program, Zahiruddin Mohd Zain.

Sementara itu, pelajar Fakulti Kejuruteraan Kimia dan Sumber Asli (FKKSA), Amir Hamzah Hamsan, 19, berkata beliau berbangga terpilih untuk menyertai PALAPES Darat UMP.

Katanya, beliau sememangnya meminati badan beruniform sejak di sekolah

menengah lagi dan tidak menyangka percubaannya ketika pemilihan berjaya melayakkannya menyertai kadet PALAPES Darat UMP.

Banyak yang diperoleh pelajar menerusi aktiviti kokurikulum unit beruniform itu, antaranya disiplin dalam menguruskannya masa dan kecekalan dalam jati diri.

Prof Daing Nasir memeriksa barisan dalam Perbarisan Utung Komandan yang disertai oleh ketiga-tiga pasukan PALAPES UMP.